

佛说阿鸩留经 1 卷

No. 529

佛说阿鸩留经

僧佑录云安公古典经今附汉录

闻如是：

一时，佛在舍卫国祇树给孤独园。

佛告诸比丘言：「昔者有贾客，名阿鸩留，居处甚富，金银珍宝，奴婢众多。阿鸩留不信有后世生，作善不得善，作恶不得恶。阿鸩留言：『人死后身、地外地身、水外水身、火外火身、风外风身皆共和合，人死后终不复生也。人所作善恶，心所念、口所言、身所行，皆当弃捐，后不复生。』」

「时，阿鸩留持财货数千万，与贾客五百人俱行。阿鸩留最尊豪相随行贾客，当经剧道无水草处，所持粮食、水草皆已尽，行一日、二日不见水草，行三日、四日不见水草。贾客皆恐怖言：『今我皆悉当于此荒泽中饿死耶！』各自啼哭，呼父母妻子。」

「阿鸩留遣骑四布，行求水草。阿鸩留自行遥见一树，树叶青青果蓏繁炽，自念此树下犹当有水，便前趣树。见一男子，端正无比，遥见阿鸩留骑马来前，迎趣之，言：『多贺来到，在所求索。』阿鸩留见树下人答之，即大喜，如得更生。树下人言：『从何所来？欲所之到？』阿鸩留言：『索救我命及五百人畜生命。』树下人言：『欲何求索？』言：『我欲得水。』树下人便举右手，水从五指端出，如流泉，甚香味，语阿鸩留言：『自极饮。』饮已复从索饭，树下人便举右手，美食从指端出。」

「阿鸩留得饱食已，便举声大啼哭。树下人因问：『仁者啼哭为？』阿鸩留言：『我等伴五百人及畜生，从三四日以来，皆不得饮食，饥饿甚极，命在

须臾，是故我啼哭耳。』树下人语阿鸠留：『若行将五百人及畜生来，我悉为若饱之。』

「阿鸠留即驰行，呼伴人语之言：『勿复忧也，已得饮食处，随我去来。』伴人大喜，便随去到树下，皆叉手，为树下人作礼。树下人问言：『欲何得？』人皆言：『大饥渴。』树下人即复举右手五指端，即复大水出，水如流泉，人马畜生皆饮；复从索饭，树下人复举右手五指端，出名美饮食与之，五百人及畜生皆饱满。」

「树下人因问：『五百人等，卿皆欲至到，何等求索？』贾人言：『我皆欲到大海，求索珍宝。』树下人因问：『卿皆欲索珍宝者，便可从我手中出。』树下人便举右手，从五指端出金银、水精、琉璃、珊瑚、虎魄、白珠，人便敛取，取各自重如去。」

「树下人语阿鸠留：『持此金银归乡里，用布施贫穷者，欲得饭者饭之，欲得金银、钱财、衣被者极与之。令道人皆祝愿我，令我得其福，令我手中出琦物，又多使我早脱此荒泽中。』」

「阿鸠留闻此语大惊怖，便以头面着地，问：『仁者为何等人乎？是天耶？龙耶？鬼神耶？是人耶？』」

「树下人言：『我亦非天、亦非龙、亦非鬼、亦非人，我是豪薜荔也。我前世时，于国中大贫穷，常在城门下坐，虽贫穷心净洁，爱乐沙门道人，我贫穷不能施人，见他人布施，代其喜。时迦叶佛般泥洹去，诸比丘来从我乞食，我应比丘言：「我无所有。」但遥指示城中，某家善可得饭，某家不善不可得饭。比丘乞来出，我见有所得，即欢喜。又迦叶佛般泥洹去，其国王名为基立，为迦叶佛起七宝塔，我辄持手着其上言：「令我得其福。」王上好物于佛塔，我辄持手着之言：「使我得其福。」但用贫故未曾斋，饭食无时又饮酒，是故死后，以作豪薜荔耳。但用我前世见人作善，代其欢喜，手着其物上，是故令我五指端在所出；但用生时未曾斋，故使我作是间薜荔。』」

「阿鸠留自念言：『我前不信有后世生、作善不得善，作恶不得恶。今我眼见，是为审有后世，复生审有作善得善、作恶得恶。从今日以去，归乡里，快当作善，布施与人，恣所求索，人有欲得金银、珍宝、饮食、衣被者，皆与之，不逆人也。』」

「阿鳩留归到乡里，语一国中人：『谁有欲得金银、珍宝、衣被、饮食者，恣所求索，皆来取之。』如是布施无央数，日日饭八万四千道人，但澜汗流出门，人用撻船而行。阿鳩留作善极意，死后便上第二忉利天上作天人，去离天帝座四百八十里。

「其国中有乞匄女人，名曰[女*参]，以善心持一杵米粥，与沙门摩诃迦叶。女人死后，亦生忉利天上作天人，在天帝释边第三座，复胜余天五事。何谓五事？一者、长寿；二者、端正；三者、安乐；四者、智慧；五者、威神，胜于余天。

「后佛母忽故，生忉利天。时佛天上为母说经。说经已，佛母及诸天无央数，皆得须陀洹道。佛因见阿鳩留布施与人，远在天帝释边，四百八十里坐；复见乞匄女人，持米粥与沙门摩诃迦叶，在天帝释边第三座，又胜余天五事。佛见悉皆识知，即遥呼阿鳩留言：『布施善人来相见。』阿鳩留即来前，持头面着地，为佛作礼，白佛言：『我布施大众多，但得凡人耳，不得须陀洹、斯陀含、阿那含、阿罗汉、辟支佛，佛道也。今见乞匄女人，持米粥与沙门摩诃迦叶，今世在帝释边第三坐，又胜余天五事。』人持小物与摩诃迦叶，得福乃尔，是故身自致豪贵如此。」

天便为佛，作礼而去。

佛说阿鳩留经

【经文信息】大正藏第 14 册 No. 0529 佛说阿鳩留经

【版本记录】CBETA 电子佛典 Rev. 1.10 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，北美某大德提供，Jasmine 提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】
